



Komunikadu Imprensa

Tribunál Judisiál Primeira Instánsia Suai

29 Janeiro 2024

JSMP Monitoriza Maioria Kazu VD iha Julgamentu Móvel Iha Munisípiu Bobonaro

Presiza esforsu koletivu no imediata atu proteje fetu no labarik sira hosi violénsia

Iha loron 11,12 no 19 Janeiro 2024, JSMP monitoriza tribunál móvel iha Munisípiu Bobonaro no konsege monitoriza kazu hamutuk 20 hosi total kazu 85 ne'ebé Tribunál Judisiál Primeira Instánsia Suai ajenda atu julga durante loron 6 (neen) nia laran, hahú hosi loron 08-12 no 19 Janeiro 2024. Hosi kazu 20 ne'e, maioria kazu Violénsia Doméstika (VD) hamutuk kazu 13 ho tipu krime ofensa ba integridade física simples 12 no maus-tratus ba kónjuje 1 (ida). Hosi kazu 13 refere, kazu 12 mak fetu (feen) sai nu'udar vítima.

“Hosi dados ne'e hatudu katak fetu sira kontinua vulnerável iha sira nia moris, tantu iha sira nia uma laran ne'ebé tuir loloos sai nu'udar fatin seguru ba membru família sira. Dados hirak ne'e representa deit número ki'ik hosi kazu sira ne'ebé tribunál julga no representa número ki'ik hosi insidénsia real sira iha sociedade. JSMP fiar katak sei iha kazu barak liu mak akontese maibé la konsege relata tanba sirkunstánsia oioin hanesan ta'uk, hetan ameasa, la hatene dalan atu hato'o keixa, laiha suporta hosi família no razaun seluk tan. Ho nune'e, presiza iha esforsu koletivu no imediata atu proteje fetu sira no labarik sira tanba labarik barak mós la seguru hosi siklu ida ne'e,” dehan Diretora Ezekutiva JSMP, Sra. Ana Paula Marçal.

Violénsia doméstika kontinua sai preokupasaun públiku, tanba loron ba loron kazu sira ne'e kontinua rejista aas iha jurisdisaun Tribunál Primeira Instánsia hotu. Fetu no labarik barak mak kontinua hetan sofrimentu ba abuzu ka tipu violénsia oioin hosi krime VD.

Rezultadu monitorizasaun JSMP nian durante tinan barak nia laran hatudu katak kazu sira VD maioria envolve mane nu'udar arguidu kompara ho fetu mak sai arguida. Exemplan dados tinan 2020, JSMP monitoriza kazu krime ho natureza VD hamutuk 423.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Hosi total ne'e, maioria fetu mak sai nu'udar vítima ka 91% kompara ho mane sai vítima ka 8% de'it. Krime sira ho natureza VD ne'e maioria la'en (87%) mak sai autór ba krime hasoru sira nia parseiru íntimu ka feen sira. La signífika feen sira la halo krime, feen sira mós sai autora ba krime hasoru sira nia la'en ka parseiru maibé porsentu kí'ik liu ka 6% de'it (JSMP nia relatóriu annual https://jsmp.tl/wp-content/uploads/Relatoriu-OJS-2020_FINAL.pdf).

Nune'e mós iha 2021, maioria hosi kazu ho natureza VD sira ne'ebé JSMP monitoriza porsentu 92 (92%) fetu mak sai nu'udar vítima no porsentu 7 (7%) mak envolve mane hanesan vítima no porsentu 1 envolve fetu no mane hanesan vítima. Alende ne'e, porsentu 83(83%) hosi kazu sira ne'e envolve la'en nu'udar arguidu hasoru sira nia-feen ka kazu 293. (JSMP nia relatóriu annual :https://jsmp.tl/wp-content/uploads/OSJ_OVERVIEW-JUSTICE-SECTOR_2021.pdf).

Hosi dadus sira nee, signífika katak fetu barak kontinua sai vítima hosi mane sira iha kontestu doméstika no realidade feen mak maioria kontinua vítima, vulnerável, nafatin la seguru maski moris hamutuk ho sira nia parseiru ka la'en ne'ebé tuir loloos fó protesau ba malu.

Maski Governu implementa mekanizmu oioin hodi proteje fetu no labarik sira ne'ebé sofre krime, liuliu vítima ba violénsia bazeia ba jéneru, maibé krime refere kontinua buras iha sosiedade, nune'e presiza parte hotu nia kolaborasaun tantu Governu, Tribunál, Parlamentu Nasionál, Sosiedade Sivil, Akadémiku, Konfisaun Relijioza, Mídia, sosiedade tomak atu kontinua halo esforsu kolektivu, fó liman ba malu, serbisu hamutuk hodi prevene no proteje fetu no labarik sira hosi violénsia.

Rezultadu monitorizasaun JSMP nian iha tribunál móvel Bobonaro ne'e, balun hetan desizaun no balun sei adia, mak hanesan kazu hamutuk 15 hetan ona desizaun (kazu 7 marka ho agenda leitura sentensa de'it, enkuantu kazu 8 depoisde prosesu julgamentu produsaun ba prova, tribunál kontinua kedas halo leitura sentensa). Ba kazu 5 seluk, tribunál adia prosesu julgamentu ba fali iha lora seluk tanba parte sira la marka prezensa iha julgamentu móvel refere.

Julgamentu móvel ne'e, prezide hosi juis Dr. Hugo da Cruz Pui. Ministériu Públiku representa hosi Dr. Nelson J. S. Magno no parte Defeza representa hosi Dr. Domingos dos Santos, hosi Defensória Públika no Dra. Tomazia Umbelina R. A. Magno hosi advogada privadu.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl